

Nuorttanaste

»Gæca dam Ibmel labba,
gutte mailme suddo guodda!«

»Son dagai rafhe su ruosa
varai bokte.«

No. 15.

7id jakkegardde.

»Nuorttanaste« maksa ovta kruvna jakkoda-
gast, bladde dingguvvu juokke poasta-
rappe lutte.

15ad August. 1905.

»Nuorttanaste« olgushoatta guovte gærde-
manost — dam 15ad ja dam 30ad bæive
juokke manost.

Armo-aige divrasvuotta.

(Okta dam ollo bægotuvvum moridus-sard-
nedægje, A. Lunde, sarnin).

»Ja Hærra celki Noahi: Mana
arka sisa, don ja obba du dallo!
Dastgo du læm mon oaidnam van-
hurskesen mu muodoi oudast dam sogast.«
1 Mos. 7, 1.

Dat vuostas sadne, mi dast æuož-
žo læ maidai vutivalddetatte. Mærkaš,
atte dat læ Hærra, gutte dam cælkka
Noahi; dat læ Hærra, gutte sardno;
ja jos dat læ Hærra, gutte sardno,
de berrim mon gulddalet. Maidai dal
aiggo Ibmel Hærra nigjidi sardnot,
lekop damditi jaskadak su oudast.

Dalle celki Noahi: »Mana arka
sisal« Nuft æuožžo min bibal-jorgga-
lusast. Muttom æra bibal-jorggalusast
læ æra sadne adnujuvvum. Mon lav-
vim davja gæcadet daid moaddelagaš
jorggalusaid. Engelas bibalest æuož-
žo: »Boade arka sisa.«

Ja de muittala Hærra Noahi a-
še, manditi son galgga arka sisa boat-
tet. Son cælkka: »Dastgo du læm
mom oaidnam vanhurskesen mu muo-
doi oudast dam sogast.« Dam čala-
baike ala læ maidai Jesus bigjam su
suormas. Lukas evangelium 17 ka-
pitalest lokkap mi: »Ja nuftgo dapa-
tuvai Noah beivin, nuft galgga mai-
dai dapatuvvat olbmui barne beivin.«
Jesus læ dast maņas čujotam Noah
aigai, Noah beividi, ja son værddeda
su ruoktohoattema dai beiviguim,
mai sist Noah eli. Mi aiggop dal
gæčcalet darkkelet iskat daihe guora-
tallat, manlakai dat læi Noah beivin,
damditi go Jesus læ cælkam, atte
fast galgga ædnam alde šaddat nuft
go læi Noah beivin.

Goas šadda daggar dille ædnam
alde?

Dat šadda daina beivin, go olb-
mu bardne ruoktot boatta. Damditi
oažžop mi ket vissas dam ala, atte
duotta læ, maid čala muittala suddo-
ulle birra, lika duotta go dat, atte
Jesus boatta ruoktot.

Mon juogam dal dam værsa gol-
ma oassai ja gæcadam dast golma
dinga, jos dagggo bokte lifči vejolaš
čielggasæbbut ibmardusa dast oažžot.

Dat, maid mi buok ouddemus
galggap gæčcalet guorattallat, læk dak
sanek »dam sogast.« Hærra celki
sudnji: »Mon læm oaidnam du van-
hurskesen dam sogast.«

Maggar læi dat sokka, man siste
Hærra læi oaidnam Noah vanhurske-
sen. I oktage mist matte muittalet
æmbo dam birra go dam, maid bibal
muittala. Damditi ferttep mi dam
gačaldakki vastadusa oažžot njuolga
Ibmel sanest. Maid muittala bibal
olbmui birra Noah aigest.

Dat vuostas ja dat ænemusad
čalbmaičuoce, maid mon gavdnam,
læ dat, atte buorek ja bahak, Ibmela
manak ja mailme manak, legje sæk-
kanam okti. I goassege ouddal oidnu
daggar oktisækkanæbme go dalle, ja
illa mateš čajetuvvut oktage dingga
bibalest, mi Ibmela moare ja rangaš-
tusa nuft læ gæssam almugi ala go
dat, atte Hærra almug ja mailme
manak læk ovtastattam ječaidæsek.
Mærkaš, man ædnag gerdid basse
čallagest muittaluvvu, atte go Israel
ječas sægoti mailmin, de Hærra ječas
eritjorggali sin lutte, ja son addi sin
vašalažai gitti bagaduvvut, aido jure
damditi go si ječasek sægotegje mail-
min. Mon logam dam, mi æuožžo
čalluvvum olbmui birra daina beiv-
vin. Dast æuožžo, atte Ibmel barnek
manne sisa olbmui nieidai lusa, — si
okti ovtastattuvvujegje mailmin.

Dat læ okta daina ænemusad
čalbmaičuoce ašin, mi muittaluvvu
dam aige birra.

Ja mi læi dat, mi dam okti ov-
tastattujume mañnel čuovoi. Čala
muittala, atte si šadde stuorra ja fa-
molaža sin ječasek čalmin — ja bæg-
galmas olbmak. Orro čajetæme, atte
čuvvggitus læi stuores. Mutto almug i
læm ollo arvost Hærra čalmi oudast.
Čielggaset lokkap mi dam soga birra,
atte go Hærra gæčai sin ala, de son
i gæččam nuft ollo sin stuoresvuoda
bællai; mutto čad kapital šad værsa
muittala, atte go Hærra gæčai sin
ala, de oini son, atte bahavuotta læi
stuores ædnam alde, ja atte olbmui
vaimo jurddagak legje bahag nuorra-
vuoda rajest. Dat okti sækkanæbme
i læm buoredam sin vaimo ige dapid;
mutto dat læi bahabun dakkam vel
sin jurddagidge. Dat læ vuostas hav-
ve, go mon čallagest gavnam, atte
Hærra læ sardnom rangaštusai birra,
damditi go olmuš jurdaš dam mi
boastot læ. Mañnel gavdnap mi man-
ga have, atte Ibmel sardno jurddagi
birra, ja sadnevagjasi girje mittala,
atte nuftgo olmuš su vaimostes jur-
daša — daggaraš læ son. Hærra oaid-
na nabbo dalle min jurddagi baha-
vuoda. Son oini, maggar jurddagi-
guim olbmuk vagjolegje ouddal sud-
doulle, ja son mæreddi, atte si galgge
rangaštuvvut. Suddoulle fertti boat-
tet ædnam bagjel, nuft atte olbmuk
šadde duššaduvvut sin bahavuodasek
gæčel.

Ovta dinga vela gavnam mon
daina beivin, ja dat læ, atte Ibmel
vuoigna læ vaibbam. Hærra cælkka:
»Mu vuoigna i galga agalaš aiggai
nagget olbmuguim.« Son læi ange-
ret barggam olbmuguim dam aige;
mutto olbmuk vuostaičuožžu nuft guk-

ka, dassači go son celki: Mon sin duššadam — eritsikastam ædnamest erit. Jurdašekop mi dal vøhaš min aige ala. Lægoston mikkege, mi čajeta min aige, atte Jesus læ lakka, atte dat bæivve læ lakka, go son galgga boattet? Ovtta dinga duostam mon vissesvuodain cœlkket, ja dat læ, atte girkohistoria dasaši i læk migjidi čajetam ovtage aige goas mailme ja Ibmel manak læk læmaš oktisækkanam nuftgo dal. I čajet historia, atte goassege læ læmaš daggar oktisækkanæbme nuftgo dal, dam rajest go Jesus algi olgussirrit joavko aldsesis. Ædnagak stuora bargoin ja aige adnemin gœččalet okti ovtastattet mailme ja Ibmela albmu. Ja dat buok bahamus læ, atte sin jakko orro læme, atte sin barggo læ buorre. Mutto muittop mi, atte Hærra læ cœlkkam, atte mailme manak ja Ibmel manak æi goassege mate okti ovtastattuvvut. Min aige dam Norga ædnamest orro læme dam lakkai, atte kristalašvuotta ja mailmalašvuotta oktisegotuvvu birra buok. Særvek rakaduvujuk kristalaš nama vuolde, ja dasa čoggujuvujuk nuft ollo go vejolaš læ. Olbmuk gæččalek okti ovtastattet dam maid Hærra ješ læ sirrim. Must læ okta rava digjidi addet — digjidi, guđek lepet Jesus lusa boattam, namalassi dat: Gæččaleket ollaset čuožžot Hærra siste ja ollaset mailmest erit. Lekus dat, lokke, alelassi du gačaldak: Man gukkas matam mon bœssat dast erit, mi suddo læ? ja man lakka matam mon boattet Hærra? Mailmin okti ovtastattubme i læk goassege mieldes buktam Hærra buoredokkalašvuoda, mutto su moare. Dat læ gal duotta, atte mailme dasa liko, go kristalažak sin guvlui sogjek, ja go si læk miettasak dasa, masa maidai mailme nietta. Mutto made mielde kristalaš mailme guvlui sogja, dađe mielde massa son buristsivdnadusa sielost ja famo soattat suddo vuostai. Ja die læ okta daina sivain, manditi min aige gavdujuk nuft ædnag famotes (nuoles) kristalažak. Vuoi dadde, man ædnagak læk, guđek vai badek Ibmel vuoina, si ječaidæsek luittek golggat dam stuora mailme ravnji mielde. Orro dego Ibmel vuoina læ gaiddam œdnagi lutte erit, vai ko galle sardnujuvu ja dovdastuvvu davja: Mi gullap særvvegoddai, mi læk kristalažak j. n. v. Mutto Hærra

cœlkkka ain dalge nuftgo dolin aige: Dak olbmuk læk vaibbadam mu, ja mon ferttim sin lutte erit gaiddat ja addet sin duššadubmai.

Maggar hirbmos sadnel! Man dat mati læm suorgatatte, go Hærra mærredi ja celki: »Olbmu bæivek galggek odnaš rajest læk 120 jage.« Bæivve læi mærreduvvum ja nannijuvvum; nuft gukkas ja ige gukkelidil! — Mutto Hærra i læk goassege rangaštam dam vanhurskasa daina vanhurskesmœttosin; Hærra i læk goassege rangaštam alma maidai armo falataga. Ja æska go arbmo læ bagjelgeččujuvum, læ rangaštus boattam. Min tækstast sardno Hærra dam dam vanhurskes Noahi ja cœlkkka: »Daga aldsesad arka,« ja Ibmel muittala, man stuores dat galgga læt. Hærra ješ læi sniettam moft arka galgga rakaduvvut, ja mi lokkap, atte Noah dagai aido nuft, moft Hærra læi gœččom.

[Lasetuvvu]

Addet, de galgga digjidi addujuvut.

Okta pappa læi okti stuora darbašes su girkos diti, mi galgai divvujuvvut. Son manai muttom rigges olma lusa ja anoi sust vœke, ja dat olmai addi sudnji stuora summa, mutto jorgeti dasto su golma barne vuostai ja jærai: »Di nuorak, maid addebetet di dam buore dakkoi?« Dat boaresæmus celki: »Mon addam buok, mi gavdnu mu bursast.« Nubbe celki: »Mon addam bæle dast, maid mon suittam,« ja goalmad celki: »Mon im adde maidege.« Arvo mielde 20 jage dast maŋnel bođi pappa fast dam sæmma gavpugi — son i læm dam historia vajaldattam — ja go son jærai dan bærraš birra oazžoi son diettet, atte ačče aigga juo læi jaman, dat boaresæmus bardne læi okta dam gavpuga riggasæmus olmain, nubbe bardne læi maidai buristčuožžo, mutto goalmad bardne i suittam maidege, son fertti cellet su vieljades armost.

* * * * *
 | * | **Gukken ja laka.** | * |
 * * * * *

Ruošša i aigo soapat.
 Maŋemus telegramak muittalek,

atte Ruošša læ gaggat sogjat rafhe guvlui. Japan gaibeda 120 million rubel; mutto Ruošša falla 50 million dušše. Ja Ruoša almug i mate arvvedet, manditi i galga Ruošša vuoitet, go læk nuft ollo nuorra gandak Manšuriast ja borramuš vœla vida manoi.

Norga ja Ruota gaskavuotta.

Nuftgo dam blađe lokkek dittek læi dam 13ad august min rikastemminbæivve. Mi oazžop dagjat, atte dat læi **Norga bæivve**, okta bæivve mi aigest aiggai šadda min rika historia blađi alde šælggat. I ovtage stuoradigge-valga aige læk Norga olbmak nuft valljid čoagganam stemminbaikedi go dam 13ad august. Ja i goassege ouddal læk oktamielalašvuotta læmaš nuft valdes go dam bæive. Gačaldak læi: Miettago Norga almug dasa maid stuoradigge dam 7id juni dam jage dagai? Daihe æra saniguim: Miettago Norga almug Norga ja Ruoda erit sirrejubmai (ærranæbmai)? Ruodaš rikabæivve (stuoradigge) læi Norgast dam almugstemmemma gaibbedam, ja muttom darolaš blađek æi likom dasa, atte Ruoda rikabæive gaibbadusai mielde dabe Norgast galgai dakkujuvut, ja vel ucceb likojegje si, go gulle, atte rađđetus ja stuoradigge miēdaiga arvvaladdama daihe nuftgo dača dagja »forhandling« Ruodarikain. 11 olbma stuoradigest legje maidai dam vuostai; ænas daina olbmain legje socialistak.

Daina manga čuođe duhat stemmain, mak min rikast addujuvujegje, æi læm go 200 arvo, mak biettalegje, atte Norga galgga ærranet Ruodast erit. Ja jakkemest læ atte ænas oasse daina »neistemmain« botte min rikast asse Ruotalažain. Alatægjost, gost ædnag Ruotalažak læk bargost Gavuona brukast, legje 13 nei-stemma.

Ruodarika almug oazoi dal oaidnet, atte oktamielalašvuotta læ Norgast dasa, atte dak guokta rika galgaba sierranassi čuožžot. Ige dušše Ruodarika dam ožžom oaidnet, mutto obba mailme. Olgoædnam blađek ramedek saggarak Norga albmu ja erinoamašet dai olbmaid, guđek dal

stivrast čuožžuk. Si arvalek, atte gal dat guokta burist bajasčuvvgijuvvum albmuga čilggijek ašidæsek.

Stuoradigge læ dal olgusnamatam daid olbmaid, guđek galggek Ruotalažiguim arvvaladdat dai gaibbadusai birra, maid ruotalaš rikabæivve ouddanbuvti. Dak olmak læk: Statsminister **Michelsen**, olgorikaminister **Løvland**, stuoradiggepræsidentia **Berner** ja oudiš statsraad advokat Benjamin **Vogt**. Ruoda bœlest læk maidai 4 olbma valljijuvvum. Dai namak læk: Statsminister **Lundeberg**, **Wachtmeister** ja statsraadak **Hammarskjöld** ja **Staaff**. Dak 8 olbma galggek čoagganek Karlstadi Ruodarikast dam 31 bæive august manost. Dak olmak namatuvvujek unionasærve latton.

Dai olmai duokken čuožžo dal soatte ja rafhe. Jos si sopek, de šadda rafhe Norga ja Ruoda gaskast, jos æi soaba, de læ visses, atte soatte šadda. Dat buok verrimus sorre, mi sin ouddi læ bigjum galggat læ vissaset ragjaladnid gačaldak. Mi muittep, atte Ruoda rikabæivve maidai gaibedi, atte dak rajaladnek, mak daina manemus jagin læk rakaduvvum, galggek vuolas njeidujuvvut. I læk buorre diettet mielttago dača dasa, atte dak divras rakkanusak duššaduvvujek. Muttom darolaš blađek orruk gal sogjamen dam guvllon, atte dak ladnek ožžuk heittujuvvuk, jos mi Ruotalažast visses loppadusai oazžop dam ala, atte son min ala i boade goassege sođin. Āra darolaš blađek orruk dam aše čera lakkai ibmerdæme. Dast mi dal mannel šaddap oaidnet ja gullat, moft manna. Dat læ visses, atte sikke Norga ja Ruoda almug haledæva ja vaimolažat savvaba, atte dat stuora politikalaš sorre galggujuvuši rafhalažat; dastgo nuft gukka go ašek čuožžuk nuftgo daina manemus manoin, læ dat ollo hettitusan buok fidnoidi ja bargohoamaidi goabbašak ædnamide.

Kristiania bisma,

Dr. A. Chr. Bang

læ gieskad čallam muttom ruotalaš avisai vastadusa ovta gačaldakki, mi læi ruotalaš papain sëmna blađes ouddan bigjujuvum bismi. Dam gačaldaga bagjelčala læi navt:

Ravas gačaldak Norga papaidi ja

kristalažaidi.

Darogiel bibalest čuožžo čallujuvvum navt:

»Gudnejattet buokaid, rakisteket vieljalašvuoda, gudnejattet gonagasal«
1 Piet. 2, 17.

»Ane arvost gonagasa bakkoma, dam vuordnoma diti, maid don Ibmel bokte læk vurdnom.« Sard. 8, 2.

»Bala Hærrast, mu barnačam, ja gonagasast. Singuim, guđek sodno vuostai čuožželek, alle særva.«

Sadnev. 24, 21.

»Olmuš berre ballat Ibmelest čembo go olbmuin.« Ap. dag. 5, 29.

Ihan vissa oktage duosta biettalet, atte dak dast namatuvvum bibalsanek, læk Ibmeta sanek, mutto moft aigobetet dalle, di Norga papak ja kristalažak, go di daid sanid gæčadeket, čilggit din javotaga orroma Norga moiverakadægje albmuga gaskast, guđek læk čuožželam sin gonagasasek vuostai.

Bisma dam gačaldakki vasteda navt:

Iloin aigom mon dast gæčæalet ožžudet min ruotalaš vieljaid Kristus siste ibmerdet, manlakai darolaš girkoalmug dai ašid læ ferttim valddet — dam namalassi, mi 7id juni dapaťuvai. Mon ferttim vuost dam gačaldaga gæčadet kristalašvuoda bælest, ja mannel aigom mon čelkket moadde sane nuftgo darolaš stataborgar ja vanhæmædnam usteb.

Oktasažat ibmerdet Ruotalažat, atte darolaš stuoradigge læ moive rakadam su gonagasas vuostai, ja atte darolaš girkoalmug, go si æi læk dam moive vuostai čuožželam, mutto baica mielttago dasa, læk duolbmam Ibmeta sane julgidæsek vuollai ja læk doagjam dam oskaldasvuoda vale, maid si gonagassi okti læk loppedam, ja damditi galggek si stuora rangaštusaiguim rangaštuvvut, maid juo Ibmel sane mielde groavva bagjelduolbmam mieldes bukta. I læk gal vadde daggar čalabaikid gavdnat, mak nannijek dam ibmardusa ja daid garraduomoid, mak ruoda bœlest min ala læk celkkujuvvum. Mutto ašše læ dat, atte ibmardusak læk boastot algo rajest juo. Must læ dat doavvo, atte ruotalaš vieljak mitte dasa, atte olmuš fertte læt varrogas boares testamentalaš čalabaikid adnet gonagaslašvuoda ja gonagas famo ja gonagasa persovna ala min aige statast.

Boares testamenta aige ibmerduvvui nuft, atte gonagas læi okta Ibmelest olgusvalljijuvvum raddeægje, mi birastattujuvvui dam šœerradvuodaš, maid dat boatte Mesias suppe su ala. Ja muttom aigid adnujuvvui son, nuftgo davalaš dam aige lulleædnamin læi, ješvaldalaš raddeægjen, gæst okto læi fabmo su vuollebužaides hœga ja davver bagjel. Nuftgo Sardnægje girjest 8, 13 čuožžo: »Gonagasa sadne læ famolaš, ja gi duosta sudnji čelkket: »Maid dagak don?« Sadnevagjasi girjest 16, 14 čuožžo: »Ovta gonagasa moarre læ jabmen sadne.« Samuel girje 8, 11 mielde læ arvvedatte, atte gonagas mati bigjat albmuga barnid viekat su vavnos ouddabælde, su bældoides sikke gilvet ja lagjet ja manga æra stuora bargo dakkat, ja atte son mati erivalddet obmudakægadin sikke bældoid ja vinegardid addem diti daid su balvvalegjidadas. Dal gočœom mon, atte ruotalaš vieljak jurdašet čuovvovaža: Jos gonagas Ruodarikast oudamaerka diti sutta ovta olbma ala ja su moarestes časka su jamas ja dasto su dagos vanhurskesmatta daid æska namatuvvum saniguim: »Gonagasa moarre læ jabmen sadne!« Nubbe have valda sëmna gonagas 8 million krivna ruotalaš statakasast ja rakada dam summa oudast muttom havskodallanšloata. Go dasto avisak ja rikabæivve bahan dam adnek, de vasteda gonagas: Mon gavnam doarjadasa Ibmel sanest. Gi duosta mudnji čelkket: »Maid dagak don?« Moarre ja rangaštus din ala, di værrevale dakket, guđek čuožželeket sikke Ibmeta-ja gonagasa vuostai!

Mon jakam, atte buok ruotalaš kristalažak daggar gavvatusa ja boares testamenta čilggitusa bijašegje vuostai. Ja mon jakašim, atte buokak ovtamielalažat čelkkašegje: Mi æp læt gullam min madarvanhemid dam jage 1809 rajest siyvatalujuvvumen moivvejægjen ja værrevale daken damditi go si æi dokkitam dam stivrijume, mi dam aige læi.

Mu jakko læ, atte buok ruotalaš kristalažak okti sopek muina go mon celkkam, atte jos si galggek min ibmerdet ja min dubmit duottavuodaš ja rakisvuodaš soavavaš duomoin, de ferttijek si aibasrak erit gæčæat boares testamentast, man dajatusak dam gačaldagast gulle vas-

sam aigedi æra gaskavuodaiguim, ja mak damditi æi læk soavavaža adnet min aige. Dak min aige stataordnegak læk aibas æralaganak go dat boarestamentalaš gonagaslašvuotta.

Dal manam mon ođđa testamenti. Mi oappat dast, atte i læk eisevaldde æra go Ibmelest, atte juokke kristalaš galgga adnet buok statast asatuvvum stivrimfamo nuftgo asatuvvum Ibmelest. Damditi galgga juokke kristalaš læt gululaš dai stivrimfamo vuostai, mak su bagjeli læk bigjujuvvum; dastgo dak læk Ibmel asatusak, damditi læ vuostehagolašvuotta eisevalde vuostai, vuostehagolašvuotta Ibmel vuostai. Geeæa Rom 13, 1 ja Tim. 3, 1.

Mutto jos vela læge nuft, atte dat mailmalaš stivrimfamok bajasdollujuvvujek Ibmel famo bokte ja mærkašet Ibmelest ordnega, de almake i gavdnu mikkege bakkomid Ibmelest dam vuoge daihe læge birra, man mielde dak moaddelagaš stivrimfamok galggek ječaidæsek ordnet, ja maggar gaskavuoda si guttek guibmasæsek galggek adnet. Buok stivrimvuogek ja lægek mattek ovtain sanin namatuvvut: eisevaldde, nuftgo olmušlaš asatus; mutto dat i gaped væhašge gululašvuoda gædnegasvuoda, maid juokke kristalaš galgga čajetet; olmuš galgga læt buok olmušlaš asatusi vuollebuš Hærra diti. 1 Piet. 2,13.

Dalle go dak Hærra vuoinast devddujuvvum apostalak, Paulus ja Pietar oapatæiga dam lakai eisevalde birra dam aige særvvegoddedi, dalle læi okta kæisar stivra oudastolmai, ja dat kæisar læi muttomin buorre ja laðes ja muttomin fast læi son okta varai manjai goike tyrana. Ja dat læi davalaš, atte dak dam aige raðdejægje kæisarak moive rakadegje ja sorbmijegje sin oudastolmasek, ja riehta mielde i læm sist mikkege vuogadvuodai fabmoi boattet. Mutto juokke kristalažast læi dat nana jakko, atte Ibmel datto læi, atte si galge gululašvuoda čajetet juokke stivrimfamo vuostai. I oktage kristalaš alggam iskat, læigo kæisar fabmoi boattam lovalaš lakai. I oktage kristalaš ječas dovddam goččujuvvum vuostainaggegoattet, go okta kæisar nubbe eritnordasti truonost. Kristalažak apostali aige adne juokke kæisara daggar eisevaldin, maid Ibmel læi asatam, ja si čajetegje su vuostai gululašvuoda,

gudnejatte su, makse sudnji væro ja rokkadalle su oudast, — buok dam dakke si Hærra diti.

[Lasse boatte nummarest].

„Nuorttanaste“ olgusadde

læ jottemen min ædnam madda gavpugin, damditi læk blaðe manemus nummarak manjanam saggarak. Go son dam nummar čalla læ son Kristianiast, ja son aigo vela fidnat 4 gavpugest ouddalgo jorgida ruoktot. Gutte væhaš jottala šadda juoida gullat ja oaidnet. Birrabuok min ædnamnest sardnujuvvu dal ænaš min politikalaš dili birra, erinoamašet dal go læk stivraolmak čoagganam Karlstadi arvvaladdat. Kristalaš čoaggalmasak dabe čoakkai bottek juokke vakkost rokkadallat, atte Ibmel min ædnam varjalifēi soadest. Dat læ dabe Madanorgast oktasaš rokkadallam avnasen, i læt æppedæmest, atte maidai duotta kristalažak Ruoda bæle dam sæmma rokkadus avdnasa adnek. Dabe Kristianiast ja daina birrasin læge dam dalve læmaš stuora moridus, duhati mielde erinoamašet nuorak, læk occagoattam Ibmelest. Suotas ja havske læ čokkat ja guldalet go dak nuorak sin ječasek čoaggalmasain alggek maidnot Ibmelest ja muittalet, maid Ibmel sin vuostai læ dakkam. Ja davja jurdašam mon vare maidai samiædnamnest nuft lifēi. Ollo daina gavpugin dakkujuvvu duotta kristalažain maidai vaivašvuoda vækкетet. Vaivašak læk galle dabe oavvegavpugestge ollo, mutto vaivašvuotta i læk goassege dam hame vuolde go ouddamarka diti Sameædnamnest. Dabe dakkujuvvu i dušše komuna bælest, mutto maidai ævtodatolažat hui ollo vaivašid væketam diti. Mæsta juokke komunast gavdnujek dat nuftgoččujuvvum vaivaš ja boarasi sidak. Dak læk stuora gardemak ædnak lanjaiiguim, gosa vaivašak ja boarrasak sisabigjujuvvujek, ja dobbe mattek si sin manemus beividæsek loapatet buore dilest. Ja de læk maidai asatuvvum halbes borramušvuovddem-baikke, gost gæfheb bælle matta gaskabæive oažžot moadde øra oudast. Vaivaš bærrašidi guddujuvvu borramuš daina halbes vuovddembaiken ja kristalažain, guðek luttetek njuorasvuoda dovdekin sin diti. Dabe læk maidai ollo stuora fidno-olmak kristalažak, si æi hæpanadda dovdstames

Kristus nama baldalagaid vuollegæbbo olbmiguim. Davja oainam mon čoaggalmasain virggeolmaid ja gavp-peolbmaid čibidæsek alde vællamen barggo-olbmaid baldast; dam im læk mon goassege oaidnam Sameædnamnest dam 15 jakkai, maid mon dobbe læm jottam. Mutto almaken lavvijek muttom sabmelažak muina naggit, atte duotta kristalašvuotta i gavdnu æra sajest go Finmarkost.

Rafhe Ruoša ja Japan gaskast.

Aido dal, ouddal go dam blaðe gærgam čallemest, dieðetuvvui telegramai čaða, atte vimak læva Ruošša ja Japan soapam. Japan læ miettam dasa, atte Ruošša maksa dušše su fangaides bajasdoalo ja aidardæme Japanest. President Roosevelt læ læmaš gaska olmajen.

Norga ja Ruoda politikalaš dille.

Dai manemus beivi telegramak.

Daida soatte šaddat.

Mašotatte sagak læk daina manemus beivin boattam Karlstadast. Norga ja Ruoda olgusvallijuvvum olbmak, guðek dobbe galgge aši smiettat æi oro læme soappam. Si mannam vakkost heitte oanekassi ja manne arvvaladdat sin raððetusaiddæsekguim. Ja min rikast legje Norga bæle olbmak maidai stuoradiggin arvvaladdame. Buok arvvalusat læk læmaš dappujuvvum uvsai siskabæle ja damditi æi dieðe vel avisa čallekke, gudemuš daina Ruoda gaibbadusain læ ænemosad læmaš dutkama vuolde. Mutto buokak læ ovtamielažat dam jurddagest, atte ragjaladnek dak læk, mak ænemosad bartašuttek. Mi diettep, atte Ruotalaš gaibbeda, atte buok ladnek lakka Ruoda raje-galggek vuolas gaikkujuvvut, vel Kongsvinger ja Fredrikshalda ladneke æi galga sestujuvvut. Dasa i mieða Norga diettalassi, ja dam arvveda Ruotalaš, ja damditi læ son raje ala čoaggam lakka 100,000 soaldat. Norga læ maidai smavvaset alggam gæsset soattevæga čoakkai erinoamašet ladnidi. Mobiliserim ollaset i læk gal vel læmaš, mutto vurddujuvvu dal.

Daida soatte šaddat.

»Nuorttanaste« čalle, prentejægje ja olgusadde læ G. F. Lund, Sigerfjord, Vesteraalen.